


Kerwezeitung

5., 6. u. 7. Sept. 1970

Sonderfahrt
Crumstadt - Metz
(Frankreich)



Turnhalle
Crumstadt

K E R W E R E D
=====

Er liewe Leit ess is wirrer so weit,
die Crumster seun off Hochturm heit.
Ess sich koaner nemme leßt,
debei zu seu beim Kerwefest.
Drum grieß isch eisch vunn fern unn noh,
die Crumster Kerb ess wirrer do.
Wos hommer doch off se geword,
honn wochelong defer gesport,
gesport honnse aa in Bonn des Jahr,
denn die Opposition ess greeßer als je zuvor.
Letzt Jahr hann mer noch de Kiesinger mit seune Leit,
jetzt sorgt schunn de Brandt fer Neiigkeit,
ver unsern Brandt isch konns eisch soche,
hot unsern Wert e schee Steffche fern Moche.
Letzt Jahr worn die Ommi uff em Mond,
unser Fußballer in Mexico hon sich ach nett geschont,
ess hot zwar nur vern dritte gelangt,
awwer trotzdem hemmer uns bei ihne bedonkt.
So monscher Droppe Schwaß is dort verflosse,
unn mer howwe dehom om Fernseh gesotze.
Enn Zuschauer aus Crumscht hett e Beruhigungsspritz gebraucht,
denn im Freudentaumel hot er sich die Hond verstaucht.
Ach sunst sinn im Ort noch Sache bassiert,
gar monscher hot sich schwer blomiert.
Bevor mer awwer zu dene Neiigkeite kumme,
werd erst meu Gläsje genumme,
unn die Musik speelt e Liedsche runner,
unn zwar unsern Crumster Kerwedunner.

G E M E I N D E D E B A K E L

Unser Dorf soll scheener wern
so beschlosse off em Rothaus die Vorstandsherrn
Rondstoahplatte, Kanalschluß
jeder Bürger hawwe muß
Des breichte mer eigentlich net zu bringe
jeder Hauseigentümer kann e Lied defo singe
Gartezwerge mit Hack un Schippe
Autoraf un Blumegrippe
Alles werd off die Gaß gestellt
daß es der Kommission gefellt
Schul-un Rothausfenster woarn mit Blumme zugestellt
So was wor noch net off dieser Welt
Was off em Trottwar stand es war nemme schee
zusamme konnt mer net meh näwenoanner geh
Jedoch die ganz Erwet die war ne Pleite
mehr hatte koan erste un ach koan zweite
Mehr stande inde goldne Mitte
unsern Ort bekam de dritte
Die Kommission war kaum aus em Ort
do kam des meiste vun de Gaß widder fort
Die Gemeinde begann mit de erste Plamage
Denkt nur an die Rothausbankdemontage
Ach am Spieß seum Lager die Bank es verschunne
un bis jetzt hot se noch koaner woanners gefunne
Ehr Leid glabt mers ich dunn net lieje
drei Heuner wern jetzt noch off de Rothausbank
Hemoridde krieje
Die Rentner wiste schunn en Dank
Hätte se widder ehr Rothausbank
Ich het anns Drinke net me gedenkt
Awwer se hommer widder eugeschenkt
Un die Musik spielt ihr liewe Leid
des Liedsche vun de Adelheid.

D E D I N G E R D I E B S T A H L

IN Krumscht wohne allerhoand Asse
jetzt dun mer uns mit oam vun denne befasse
De long Horst er wohnt in de Leuschnerstroß
fuhr neilich mit seum Schlepper loß
De Güterbahnhof in Stockscht war seu Ziel
do wollt er Dinger holle un zwor recht viel
Moiyens schunn hot er seun Dinger geholt
weil er Mittags off die Brautschau wollt
Wie Mittags die oannern seun euetroffe
moane se de Waggon wer offgebroche
De Waggon es offe de Walter mergts glei
un rift goanz schnell die Bahnpolizei
Diebstahl an Genossenschaftsgut
kreischt de Walter voller Wut
Deß woarn die Stockschder Bauern hots gehaase
denn en kloane Mann braucht doch net so veel Dinger
ver seun Raase

Anzeige gähe Unbekannt
denn der Dieb war jo noch net bekoannt
Als Fingerabdrick un Fußspurn offgenumme woarn
konnte die Bauern mit ehre Dinger endlich heimwärts foahrn
Am nechste Doag kimmt de Horst mit seum Fohrrad in die
Genossenschaft gerollt
un denkt jetzt werd die Quittung gehollt
De Walter un de Heinrich kumme aus em Biro rausgeraast
un kreische jetzt werd de Täter eugegraast
Dem Horst schlaggern die Knie des es goanz klar
denn er sieht sich dem Knast goanz nah
Die Ohzeig werd zurickgenumme
daß de Horst net brauch zu brumme
Meun lieber Horst ich geb der den Rod den merk der ver
immer

Nemm aus em verblommte Waggon koan Dinger
Un die Musik spielt dem Horst dem Django
Den Kriminaltango.

A N L E R S C H I C K S A L

Viele Mensche in unserm Ort
betreibe nooch ihrer Art so mansche Sport
So manschem fellt was bsondres eu
Caner fährt zum Angle an de Rheu
Doch warum soll mer in die Ferne geh
in Krumscht hommer selbst en Angelsee
In unserm See seun Fisch weitaus genug
die schmecke gut un hon net den Altrheu-Geruch
Will oaner freilich off Aalfang geh
die find er net in unserm See
En Nache gemiet so denkt de Horst
un begibt sich an de Kühkopfforst
So hot er dort drei Stund in seum Nache gesesse
die Schnoke honn en halb gefresse
En Aal wie en Wißboam hot er am Hoke
doch der hot en ins Wasser gezoge
Er lag do drinn in de dreckische Brieh
Er stand im Schlamm bis an die Knie
So dreckisch wie de Jerme sah er aus
als er aus dem Puhl kam raus
Gestunke hot er wie noch nie
was will er ah in der Altrheubrieh
Mit so nasse Klamotte traut er sich net hoam
drum hot er se dort gehenkt an en Boam
Mit viele Worte hot en noch seuner Rettung
die Mathilde empfoange
Ei werste doch net zum Angle goange
Werste offs Fischerfest un hetst zwo Aale erworbe
werste im Altrheu net beinoh gestorbe
Jetzt hob ich genuch geredt vum Rheu
jetzt brauch ich widder e Gläsje Weu
Un die Musik spielt daher
Wenn das Wasser im Rhein goldner Wein wär.

Wie robbt mer e Scheier ob?

De Rentner Jakob unn seun Sohn Peter,
ich glab die beiden kennt ein jeder.
Die hatten beide groß Courage,
mit ihrer Scheunendemontage.
Am Samstag früh beim Hähne Krähn,
sah man sie in die Scheune gehn.
Die Scheune war ein Dorn in ihren Auchen,
sie konnten sie nicht mehr gebrauchen.
Drum gibts nur ons sie kimmt eweg,
unn do kriegt de Nochber a de Dreck.
Jedoch mit den Schicksalsmächten,
ist kein ewiger Bund zu flechten.
Om Korzebalge in de Spinnewewe,
kämpften sie beide um ihr Lewe.
Die Balge die worn sehr schnell dorsch,
ko Wunner, denn sie worn jo old unn morsch.
Wie Akrobade sinn se die Lader runner, daß
se noch lewe is werklich e Wunner.
Koum hattese fesde Borem unner de Fies,
Do lag die Rückwond schunn beim Spieß.
Die Sternwond, dess is eich all bekonnt,
die iss in de Bäckerei gelond.
Wie bei em Hurikon ging e Stabwolk in die Luft,
die Nochberschaft hot sich verdufft.
Zwa Stunn hot de Jakob nix me geseje,
denn de Stab hottdem so in de Ache geleje.
Dann gabs e friedlich Ausenonnersetzung mit de Nochbersleit,
mit welcher Tonstärke, des könnt er eich denge er Leit.
Off omol die Leni rifft, alles is ruhig, jetzt spricht die Mutter,
do wor donn schließlich a alles in Butter.
Die Streidichkeide sinn jetzt längst verdaut,
unn in de Gorde werd enn Bungalo gebaut.
Dorsch den veele Staab er liewe Leit,
bin ich zum dringe wirrer bereit.
Unn die Musik speelt dess Lied, dess jeder kennt,
Wann eine alte Scheune brennt.

En dolle Polterawend

Vor ner Hochzeit erquickend unn lawend,
is der bekannte Polterawend.
Mer hot des sogor in de Zeidung gelese,
in Golle wor enn Polter awend gewese.
Mit ner Roll voll Dreck unn oltem Klimm-Bimm,
seun e por Crumster noch Golle hin.
Um Abschied zu nehmen vunn oner Holde,
die unbedingt nach Golle wollte.
Nach getaner Arweit howwe die Kerl in de Wertschaft gesesse,
es gab zu Dringe awer nix zu esse.
De Volker denkt, zu Esse gibts nix in Golle,
do wer ich wos vunn Geusem holle.
Er hot jedoch schunn allerhond getonkt,
hinner leem is er im Schossegrowe gelond.
E Wunner wor gescheje ich konns eisch soche,
der Bulldog hat sich zwamol iwverschloche.
Unverletzt koam der Volker aus de Trimmer raus,
unn zu Fuß macht er sich uff de Weg noch Haus.
De Willi unn de Leo kame donn in aller frieh,
on die Unfallstelle hie.
De Willi segt, dess is alles net so schlimm,
denn mer worn frieher ach mol Kinn. Bei dem Unfall
wor enn Kasde Bier mit debei,
nett oa oanzig Flasch ging entzwei.
Ich hob vumm dringe genuch jetzt geschwätzt,
drum werd meu Kehl wirrer benetzt,
unn die Musik speelt, dess werd er versteh,
Hochzeit mache des is wunner sheh.

E W E R B E F A H R T

Um die Krumschter Bauern zu fange
is vum Kurt aus e Fahrt in die Claas-Werke ergoange
Noch Metz in Frankreich ging die Foahrt
un moanscher hot schunn off so was gewoahrt
Denn in diesem Land gibts Rotweu un Schnecke
als Delikatesse
un so moanscher hot sich schunn schlecht dro gefresse
So etliche Bauern honn sich zusamme gefunne
un Sunndoagsmeujens hon se dem Paul seun Bus erklumme
Unnerwägs segt de Paul wer zuveel drinkt
duts in sich behoahle
sunst muß er vern Bus die Reunigungskoste bezoahle
Awwer het er geahnt was die Sach veern Laaf het genumme
wwer er off so schlechte Sprich net gekumme
Jedenfalls treffe se tapfer un treu
Sunndoagsmittoags in Metz dann eu
Un eh Mondoagsmoijens die Besichtigung werd gefiehrd
honn se noch en große Dorscht verspield
De Paul segt ich kenn e poar gure Kneipe
dort kenne mer uns heid Owend die Zeit vertreiwe
De Rotweu es dort in Ströme geflosse
un Schnecke honn se ah genosse
Off oahmol dut de Paul noch seum Bett dann froche
do honn senn gemeinschaftlich hoamgetoache
Vorm Hotel hot er seun Mageinhalt kontrolliert
un mit Rotweu un Schnecke e Moped verschrammariert
Am nächste Moijend war seun Kopp noch net klor
un mit em Oamer im Bus beugt er gehe Iwwelkeit vor
So hot er sich dorsch de Berufsverkehr gedrickt
un sich efders emol noch unne gebickt
De Oamer war schunn voll bis an de Roand
do hots em Paul schließlich gelangt
Do hom ehn die Bauern kritisiert
daß er sich jetzt hot so blamiert
Erst hot er die Große Sprich gerisse
un sich dann selwer iwwergewwe misse
Un die Moral von der Geschicht
Paul loß die Finger vum dem Schneckengericht
Un die Musik spielt em Paul dem Schneckenbolero
Auf in den Kampf Torero.

D I E D A C H D E C K E R - H E D D I

Dächer erneuern es die große Mode
so denkt in Krumscht so manscher Schote
Wie e Kronkheit kam des in unser Ort
jetzt seun die Dachdecker widder fort
Ach bei de Heddi in de Kaiserstroß
war die Rüsselsemer Dachdeckerbloß
Off em Scheierdach die Zieel woarn so merb
wie Zunner
es gab nur oans die misse runner
Beim Zieel noffgewwe wor die Heddi debei
denn des Dach sollt an oam Doach widder in dierei
Am nechste Doach beim Gummernabliwwern hot se geflucht
denn in alle Ecke hot se ehr Uhr gesucht
Off omol kams ihr in de Sinn wie im Troam
ach die henkt jo noch im Gadde am Boam
Dess het die Fraa ach kenne wisse
zwo Kässte Bier un sie het net helfe misse
Der Fraa ruff ich zu ver alle Zeiten
Schuster bleib bei deinen Leisten.

Berufsrisiko eines Milchsammelstellenleiters

Im Winnder dess weiß jeder Monn,
sogor de Reinhard Petermonn,
daß es im Bett am wärmsten ist,
wenn man wie er verheirat ist.
Im Sprichwort heißt's so wunderschön,
wenn es am schönsten ist muß man auseinander gehn.
De Reinhard muß in aller frie,
an die Milchsammelstelle hie.
Eugefromn war dess Schloß in dieser Nocht,
de Reinhard hot die Tür nett offgebrocht.
Er wor grad dro die Fensder euzuschmeiße,
do socht de Londwirtsmeister Ernst gonz leise,
geb de Schlüssel doch mo her,
e Der offzumache dess ess nett schwer.
Der hott do klei mit Kraft prowiert,
uns Uglick wor schunn glei bassiert.
De Schlissel der wor obgebroche,
ko Wunner bei dene stagge Knoche.
Mit Ho-ruck unn mit vereinter Kraft,
howesses mit Gewolt geschafft.
Dess Schloß wor futsch, die Füllung hie,
nur alles weje dere weiße Brie.

So könnt ich eich noch monsches soche,
awer de Wertt det schenne, er dut mer es Geschäft forttroche.
Denn der hot sich gonz mächtig gericht,
alles mögliche werd heit offgedicht.
Er hott geschlocht zwa große Mugge,
die Resie konnt nett driewer spugge.
Rippscher unn Kottlett fern Deller zu groß,
unn bei de Brotworscht gibts noch Soß.
Hähncher mit Brot unn mit Pomfritt,
ich kann eich soche alles is fitt.
E Bierche hott er unn enn Weu,
in koner Wertschaft kennt dess besser seu.
Deshalb er Leit unn nett schieniert,
unn mit uns ereu maschiert.
Er Musikonnde setzt euch in Marsch, unn fongt gleich o,
die Crumster Kerb is wirrer do.